



鹽法考卷之十七

廣東事例

一順治捌年伍月廣東巡撫李棲鳳南贛巡撫劉武元

會題稱江西南安贛州吉安參府之行廣鹽也肇自

正德年間兩廣用兵缺餉奏准行廣鹽贛州南雄俱

設關廠抽稅助餉其後旋裁旋復至正德拾貳年先

臣王守仁奏准南安贛州吉安袁州臨江伍府俱食

廣鹽至萬曆參拾陸年間經鹽臣題准南安贛州吉

安參府永食廣鹽自此刊為定制無異議矣廣東所



屬地方薄近海隅延袤斥鹵居民大都鬻鹽為生轉
相運濟內而鹽司外而閔廠皆權以充兵需貳分備
餉捌分濟邊省於加派是誠計安兩省之上策也况
參府接壤粵東費省而價廉為民情之所樂就距淮
甚遠費重而價貴為民情之所苦難貳者業已判然
且粵東鹽司南雄太平橋贛州閔權俱有一定之餉
而贛粵解部養兵亦有一定之例若一旦改食淮鹽
縱部餉可以豁免而兵餉實難槩蠲今粵東尚有參
府未服

王師征討方殷正以粵餉不足求濟鄰邦又安能割分
內之額餉以悞軍國大計也臣部覆

准查南贛吉安參府原食淮鹽明時嘉靖年間改食廣鹽
後雖鹽臣屢爭食淮鹽而仍還之粵也非為無見前
江西撫臣朱延慶題將參府仍食淮鹽臣部請

勅南贛廣東各撫臣與兩淮巡鹽御史查議明確今據廣
東南贛貳撫臣會議前來似應照舊仍行粵鹽之為
便

一順治捌年拾月廣東巡撫李棲鳳為東粵地方初定

鹽課萬難取盈題稱粵東鹽稅在前朝萬曆年間止
捌萬柒千有奇至天啓崇禎間驟加至壹拾柒萬然
此壹拾柒萬非出廣東壹省蓋合江楚廣西諸行鹽
之地交通販易而言在昔承平尚有拖欠況今地方
用兵道路梗阻除廣西壹省及湖廣之衡永江西之
南贛吉本省之雷廉等處共餉玖萬有奇商販不通
尚不可問而內地額餉捌萬有奇則場埠荒廢海寇
縱橫船隻殘毀富商潛匿今嶺海之間伏莽未靖兩
藩發兵分剿月餉時不容緩不惟解部者難以取盈
而應留者亦復無幾祈暫除江楚廣西雷廉等處玖
萬餘兩俟蕩平另議外其本省額餉捌萬餘兩則照
各權閩事例現徵若干即解若干仍准存留給兵俟
四路平定商販疏通遵例照徵另疏題報臣部覆

准廣東壹省明時歲額鹽餉壹拾柒萬有奇柒分解部參
分留充兵餉此成例也今該撫疏稱本省額稅捌萬
餘兩照各權閩例隨徵隨解暫准留充兵餉查粵東
地方初定兵需甚急自應如議留用年終報銷其廣
西湖廣衡永平樂江西等處計稅玖萬餘兩查江西

南贛吉參府約餉參萬伍千業經本部覆

准仍食廣鹽則前餉已有參萬伍千兩毋庸再計所有缺額伍萬伍千兩目今粵西大兵雲集蕩平有期不妨漸次酌徵以濟急需至應解部銀兩事平之日仍當照舊解部

一順治玖年柒月廣東巡按楊旬瑛為粵東疲困已甚鹽課驟難取盈題稱從來鹽課之利利在行也然行有行之地焉疆界是也行有行之人焉商客是也行有行之具焉船隻是也乃此時之粵柳桂衡永猶如

隔膜江右參府雖復並無壹客行鹽雷廉兩路纔通未見壹商承拆則幾無地矣同壹埠商也向有柒拾貳埠今僅肆拾餘人勉強承當咸思退避則幾無人

矣向之行鹽者伍百餘艘伍日壹盤百艘咸集今兵將拘刷運糧應援所存不過貳拾餘艘則幾無具矣今壹年有餘纔徵過各項銀柒萬玖千叁百柒拾柒兩零則與賦役全書開載萬曆肆拾捌年歲額約拾貳萬陸千餘兩者數甚懸絕至若減斤增引條目未頒無憑遵依乞

勅部裁酌頒示畫一以便遵行又從來官私貳鹽勢不兩行私鹽行則官鹽阻昔之私鹽不過菜傭鼠雀今則地棍土冗憑藉營頭茂稅闖關有挾壹票而行參肆票之鹽者橋廠不敢稽巡緝不敢問致水客商人聚被積壓不能運販餉額多虧伏乞

嚴飭再有恃強抗稅者輕則照法究沒重則指名糾叅臣

部覆

准查粵東鹽課歲額壹拾柒萬有奇據稱瘡痍未復鹽法廢弛然漸次疏通自可足額又稱土棍興販私鹽應

聽撫按嚴禁至經制臣部已經請

勅撫臣酌定報部今再請

勅撫按公同確議定為經制具奏以便覆核定奪

一順治拾年參月廣東巡按御史楊自瑛為粵東恢復伊始課引徵銷不前祈暫寬考成以勵後效題稱順治捌年分粵省鹽課未完鹽道提舉州縣等官何辭怠玩之咎但粵省新當向風海隅尚多伏莽煮海灶丁逃亡失業行鹽商販寥落晨星致催科政拙課額不充委係阻於時勢並無別情較他省承平未可一

律乞

俯從寬罰責效將來臣部覆

准粵東初入版章戶口凋耗鹽課未完情有可原合無暫從寬政免其叅罰仍設法催完如因循逋欠該撫按即指名叅奏

一順治拾年捌月廣東巡按御史楊旬瑛題報順治玖年分經徵鹽課并銷引未完各官臣部覆

准粵東地方寇氛未靖經制引目尚未頒給其未完鹽課各官姑免叅罰仍行令鹽法道勒限催完如再逋欠

定行叅處

一順治拾壹年柒月廣東巡撫李棲鳳為東粵地方初定鹽課萬難取盈仰祈寬減以培商脉題稱粵地濱海斥鹵之鄉近場鹽賤引目所不及施所行引者惟廣惠南韶肇伍府與通販於廣西之梧州懷集及平樂之富川賀縣照萬曆肆拾捌年例計引伍萬玖千捌百零捌道每引行鹽拾肆包每包斤數則視地之遠近微有差等成例具在今若減鹽分引剖壹為貳以柒包為壹引則該引壹拾壹萬玖千陸百壹拾陸

引每引之餉亦按舊數而剖分無益於餉徒增繁擾
其引似不如仍舊之為便且用兵之後埠地荒殘雖
極招徠未能復聚故有曠廢無徵銀壹千柒百伍拾
陸兩叁錢柒分若夫天啓崇禎加增之柒萬捌千貳
百捌拾玖兩捌錢玖分零值茲商困已極正額尚苦
輸將加增詎能樂辦矧州縣徵賦一照萬曆肆拾捌
年則例則逐末之商似應驟為豁免其舊額應徵者
一項鹽司引課與各府場課共銀壹拾貳萬陸千捌
拾貳兩壹錢伍分肆厘壹毫貳絲又徵解布政司額
餉一項橋廠鹽稅該銀壹萬貳千玖百玖拾柒兩壹
錢玖分肆釐陸毫又各府徵充兵餉一項鹽稅等銀
共肆萬伍百叁拾陸兩叁錢捌分伍釐壹毫陸絲以
上叁項歲共銀壹拾柒萬玖千陸百壹拾伍兩柒錢
叁分叁釐捌毫捌絲外此則有廣西梧州徑收徑走
該府并懷集引餉銀壹萬陸千捌百陸拾壹兩捌錢
此皆輸自商客徵諸場灶柰地方初附鹽路未通商
多累足灶丁流離故按籍雖有其數而時詘實難取
盈則恤凋矜歎不得不懇

聖明之鑒軫矣臣部覆

准查廣東鹽課該撫疏報歲徵銀壹拾柒萬玖千陸百壹拾伍兩柒錢叁分零較之明額相去不遠其梧州懷集引餉銀壹萬陸千捌百陸拾壹兩捌錢照數徵收貳項均准留充兩省兵餉統俟事平解部其加增銀柒萬捌千貳百捌拾玖兩捌錢玖分零并曠廢無徵銀壹千柒百伍拾陸兩叁錢零據稱係天啟崇禎年間因兵餉議加今商困已極緊請豁免似應照依准浙例浮課准其蠲免者也至鹽引經制我

朝以貳百斤為壹引今撫臣疏稱地方初附剖分多引無益於餉請以仍舊為便似應允其所請暫准舊額伍萬玖千捌百零捌道仍如河東例壹年壹請每於年前先期請發不悞見年行運

一順治拾叁年玖月廣東巡按御史張純熙為嚴查奸書以裨鹽政題稱粵中向來東莞潮州人每每家為客商而身克吏書或撥辦本道或指叅課司表裏為奸不可究詰又有壹種魚戶蛋民起家點充司吏串同哨兵接濟窩藏最為隱害應盡行搜剔釐革永著

為例行布按貳司遵照以後凡有納餉撥叅係鹽道
鹽司衙門者俱不許用前項人役以滋蠹害臣部覆
准從之仍嚴行申飭

一順治拾叁年玖月廣東巡按御史張純熙為清查灶
丁以裨鹽政題稱粵東各府場課共額徵壹萬伍千
有奇按場徵課計丁辦鹽缺壹丁即缺壹課矣自兵
火之變其間鹽場殘壞灶丁殺擄逃亡不可勝計拾
年於茲未經編造死亡逃故者不與開豁新生續長
者未及收入場司按冊索課或有戶大丁多納引反

少戶貧丁少納引反多偏枯不均莫此為甚請自今
為始

勅行鹽法道轉行各府州縣逐一清查原額灶丁若干逃
亡者若干見在若干新長成丁者若干確查明白果
係年久亡故通行開除遺下灶課盡行豁免如有新
長成丁查酌補入如民間黃冊一例編造伍年壹次
永著為例如此則在戶照下以計鹽在官按籍以徵
課始無苦樂不均之嘆矣又疏題復峽口之盤以裨
鹽政稱粵中西運梧州平樂富賀等鹽必由肇慶今

盤割截角納餉俱在本府黃江廠臣查舊制尚有峽口壹盤以防接濟而塞傍竇最為得力今廢而不行昨臣巡肇慶舟入峽口見山勢陡峻四面壁立竦峭壹水中流湍急而深除舟楫外行人皆攀緣石壁而走臣細問土人此為入粵西江口之總會也過此即有小港汊江散漫分渡而不可稽矣臣益信峽口壹盤前人真得其要也此處仍須復立盤廠即着嶺西巡道或伍日或叁日親到峽口盤驗註明冊簿放行而割沒截角納餉等事仍在黃江廠仍移行梧州廠各立簿比對照驗梧州廠有溢則問黃江黃江有溢則問峽口如此循環周密縱使奸商有鬼運之術諒亦無飛渡之勢矣蓋復峽盤者所以防走漏而不割沒截角者所以去重稅也又疏稱鹽船盤驗各有定所凡水客商人在省告盤各船齊集定海門外聽委官盤查此舊例也自粵東恢克已來商客狡悍百端不遵舊制逐處灣泊希圖夾帶漏稅乞嚴加申飭以後各船仍照舊齊集定海門外掣鹽處所委官聽盤務照點定倉口徹底秤掣如上成角包下用散裝鹽浮

於引者填報明白按律究沒商人盤過之鹽限伍日
內納完餘餉開行水客盤過之鹽亦限伍日內納完
餘餉兌商若過限不納即以重復影照究罪倘委官
奉行不實需索陋規衙蠹勒詐常例蠹害商客者

題叅拏問又既稱商人行鹽惟憑旗票舊例埠商拆引
單同旗投道給道字號同單發司給與照兌告盤後
完納餘鹽執旗赴道領票赴批驗所將旗票截左角
仍於角內寫埠商某船戶某買生熟鹽各若干引於
某月某日某處掛號開行訖合同處仍書某處驗截

字樣用關防鈐之角先繳道開行至各廠投驗旗票
盤割復截右角其掛號合同鈐蓋悉照前例角亦按
月繳道查核仍行牌沿途總哨如商人旗票有未經
截角而先回埠賣已經截角而遷延河下及有旗無
票有票無旗者以私鹽論至客旗用白商旗用黃白
旗不許到埠黃旗不許到場此前人立法之善用心
之詳故奸商無從影射今法久弊生夾帶影射有壹
次旗票而復行貳叁次者壹船正鹽竟夾帶過半者
法紀凌弛祈

天語申飭照例截角刊榜勒石以垂永久又疏稱水客告
票往場買鹽舊例由虎門出海至場該場官掛號將
到場開行月日截角鈐印登填發行回投虎門寨驗
明掛號截角放行限叁日到省過限究罪此兩下照
應以防影射盜賣法至善也自崇禎拾伍年裁革場
官惟虎門寨掛號而已不知時異勢殊昔之鹽法嫌
其過密過密則病商今之鹽法恐其太疎太疎則病

國祈

勅部查議將水客船各定則例大者載百引上下小者載

叁肆拾引上下著為定制行提舉司吏目烙號與旗
票引數相符開行到場仍復添場官掛號截角填到
場起行月日回經虎門寨掛號對驗放行如無場官
鈐號者即以私販究罪違限者照罰又疏稱官鹽壅
滯由於私販盛行私販盛行由於捕緝不力則兵壯
各役不可不嚴也查舊例行鹽地方分為極衝次衝
次僻極僻定限所獲鹽斤以別功罪如極衝每月限
獲鹽叁百斤次衝每月限獲鹽貳百斤次僻每季限
獲鹽叁百斤極僻每季限獲鹽貳百斤各填入比簿

按季赴鹽道查比如數者免責不足者除責懲外仍扣抵工食以充鹽價額外多獲者照例參分給壹充賞法至密也今則虛應故事經年累月緝獲罕聞兵壯人役者不赴比積久陵弛祈

勅部查議并飭守巡道暨副叅等官各照例舉行守巡道則比較民壯道丁副叅遊則比較塘兵哨守如此則鹽法日密私販術窮矣又疏稱粵東私販與別省不同商無定名凡有本錢之人皆可納餉充商兼之士充窩接往往藉營頭官商名色揚帆滿載挿弓帶刀大張旗號燈籠公然私販莫敢誰何尚有將盤鹽之人肆行毒毆者接踵尤甚成何法紀若非嚴行責緝此風未易息也請

勅部查議凡水陸總轄隘要之處責成各處守巡道副將叅遊時加巡緝盤詰壹年按四季冊報督撫與臣衙門查核盤獲多者

題叙紀錄如有疎防走漏者查係某地某汛即治某道將以疎玩之罪如此大家齊心併力設法盤緝庶私販杜而

國課充臣部彙議覆

准查粵東初定鹽法廢弛該按條議整飭相應准從請

旨嚴行申飭該地方官吏商灶人等一體遵行如有故違

按律治罪

一順治拾叁年玖月廣東巡按御史張純熙為敬陳鹽法壅滯之由并酌因時疏通之法題稱粵中鹽政有

大費商確者查通省埠引壹萬伍千餘道舊有定額按埠督銷今柴門蚬塘等埠共曠數拾餘處則缺額已叁分之壹矣通省水客引價餘餉額定每年叁萬

伍千有奇邇因寇亂焚船劫票以致客商逃亡驚散則缺餉又拾之柒捌矣各府場課連年兵火之餘灶廢丁絕解報者拾不貳叁矣至南梧連韶肆路散拆

鹽引共肆萬肆千餘道向借各省行鹽之地拆賣消售由南雄度嶺而達於江右南贛吉叁府歲消廣鹽不下貳拾餘萬由梧州入桂林至全州以達於楚之衡永由韶州至樂昌石平村徑達於楚之郴州宜章由連州至星子白牛橋徑達於衡之藍山臨武各散拆引鹽舊例幾至貳萬餘引是以伊時鹽路疏通鹽

課充裕、柒分解京、參分留司、無匱詘之憂也。今則南
贛吉參府、半食淮鹽、而又間雜汀鹽、北客寥寥、南商
日困、以致營頭土冗、私販私售、越界攙埠、無所不為。
是江右參府、雖有食廣鹽之名、而無食廣鹽之實、見
今南雄、連年壹萬捌千引、目無計完銷、若粵西則止
行於梧州、平樂、富賀、懷集等埠、而衡永壹路、向食廣
鹽者、杳不可問矣。至郴、宜、藍、臨等處、近多係私鹽夾
帶、往來冒越、而石平、白牛兩路、鹽引又復壅滯不行。
舊例拆至貳萬有餘、今拆貳參千、而不足時、異勢殊
多、寡通塞之間、何啻霄壤、為今日計、急當講明鹽界
疏通、官引禁絕、私販誠為要著、請

勅部詳加察核、各省鹽考、舊制某處向食淮鹽者、照食淮
鹽某處向食粵鹽、而今阻塞者、仍舊疏通、改歸粵鹽。
大江一帶、關津、閘口、隘要、防汛之處、嚴加譏察、盤驗
不許夾帶、越販。臣仍與贛撫商酌、禁戢汀鹽、庶私鹽
杜而官引自行矣。臣部覆議、查舊制南贛吉參府屬
兩淮分行、後歸廣東、衡永貳府屬、廣西分行、今阻塞
不通、但時勢不同、應該地方官酌量、派行。臣部難以

懸議請

勅粵東粵西撫按并兩淮鹽臣公同確議具奏以便酌覆
隨據兩淮巡鹽御史白尚登疏稱查行鹽銷引各有
地方越界混行即係私販楚省之衡永等府自明時
成化年間歸粵江西之南贛吉參府嘉靖年間因兩
廣用兵缺餉議銷廣鹽以佐軍需遵行百餘年矣今
東按題疏所重者講求疆界疏通官引西按題疏以
衡永寶參府嚴禁越境混行但查衡永南贛吉伍府
既經久已歸粵而淮鹽運銷口岸從未派及彼地歷

來冊籍可稽今稱半食淮鹽蓋因江楚銷鹽之官覺
察不嚴或有彼處奸輩影射私販應飭行江楚銷鹽
衙門嚴禁以後不得越界混行衡永等府照舊盡銷
粵鹽其淮鹽止銷派定淮地庶疆界獲清而成例不
紊矣又據廣西巡撫于時躍會同兩廣總督王國光
廣東巡撫李棲鳳題稱粵西地不產鹽惟轉運於東
省由梧平桂林出全入楚行於永寶貳府屬及衡州
府之衡山縣此明嘉隆年間舊制行之百有餘載向
因粵地寇亂遂致淮鹽越售今所通者惟東安壹縣

銷食無幾引課日虧東西並困蓋由此耳據道廳會
議首清界限將衡永寶屬仍照往例盡食粵鹽其淮
鹽不許越境私販並請

勅沅撫嚴飭該地方官照聽節制載入考成行鹽地面既
廣引目自銷况淮鹽久不銷於衡永寶屬業經鹽臣
查明題覆今之越境售賣者悉皆奸商積棍射利私
販無益於淮有損於粵不亦彰明較著哉臣部覆

准查粵淮鹽法既經督撫按鹽諸臣酌議妥確應照原題
仍行粵鹽其兩淮越境私販嚴為禁止

一順治拾伍年貳月廣東巡按御史趙之麟題稱粵鹽
引目包斤餉數舊有規則原與淮鹽事例迥異自我
朝定鼎奉文酌定經制業經前撫臣入

告允行茲復奉部文照兩淮例以貳百斤為壹引查粵東
鹽引每引行鹽拾肆包餉照萬曆年間則例埠頭每
引徵軍餉玖錢加餉壹錢引目銀壹錢紙價叁厘共
銀壹兩壹錢叁釐若往場埠則每引加銀肆錢連韶
散拆每引徵軍餉壹兩貳錢引目壹錢紙價叁釐共
銀壹兩叁錢叁釐南雄散拆每引徵軍餉玖錢在南

雄府納加餉貳錢引日壹錢紙價參釐在鹽司納梧
州散拆每引徵軍餉玖錢在梧州府納加餉伍錢引
日壹錢紙價參釐在鹽司納若夫餘鹽則不論埠與
散拆之商每引約納銀參錢陸分肆厘伍毫又有經
過橋廠盤割如清遠廠浚光廠則每包各抽銀陸釐
肇慶府黃江廠抽銀肆釐南雄府太平橋每包抽銀
壹分此定例也至於鹽包斤數則分生熟及地方之

遠近南雄連州梧州韶州富賀英翁仁化扶溪濠瀆
始興各埠生鹽每包連包絡重壹百伍拾叁斤半熟

鹽重壹百肆拾叁斤半陽山乳源曲江浚光生鹽每

包連包絡重壹百肆拾壹斤半熟鹽重壹百肆拾斤

半其餘神安江浦龍川羅定等埠生鹽每包連包絡

重壹百貳拾捌斤半熟鹽重壹百貳拾柒斤半原分

路途遠近經廠抽盤稅疊之煩途近則易於盤載途

遙則有江灘險阻船脚載運走鹵折耗斤數故有不

同然輸餉實同原無病於餉額商民亦無容滋弊也

若減鹽分引則餉亦照舊額剖分無增於餉而徒繁

分引此撫臣所以具

題於前而鹽道藩司會議復請仍舊為便也臣部覆議
各省鹽法俱有生熟之別途路亦各有遠近不同其
鹽課雖有輕重各異而每引行鹽俱貳百斤廣東亦
應照淮浙之例每引行鹽貳百斤應

勅該撫確查額引若干以貳百斤為壹引計筭共引若干
每引徵銀若干共銀若干至於每引銀數務要均平
畫一酌妥奏報復據按臣趙之麟疏稱全粵鹽引舊額
伍萬玖千捌百零捌道今以貳百斤為壹引分而晰
之該引陸拾壹萬貳千貳百柒拾道零柒分伍釐舊

例紙價該銀壹百柒拾玖兩肆錢貳分肆釐今加增
計筭歲需紙價銀壹千捌百叁拾餘兩按以原例歲
徵軍餉紙價場餉餘鹽各項共銀玖萬捌千捌百零
伍兩柒錢玖分以陸拾壹萬貳千餘引派之每引該
銀壹錢陸分壹厘叁毫零此就舊引筭加引目以均
餉銀求合淮浙之例也粵東僻處天末寇氛未靖今
一旦每引增至十倍實為繁苦合無暫領引紙壹半
俟人民生聚日繁戶口殷富然後照額全領臣部覆
准廣東途路遙遠往返關領繁苦難比別省應仍暫照舊

例遵行俟地方大定之日再照淮浙之例更議

一順治拾伍年肆月廣東巡撫李棲鳳為敬陳鹽政壅滯之由題稱鹽課歲有定額行鹽各有定界不容越也緣兩粵地方初復向來鹽之由東粵而行於江西之南贛吉參府與西粵之取東鹽而行於湖廣之衡永寶參府各以兵戈未息鹽政壅滯而兩粵按臣先後

後疏

請酌復舊制通商便民部覆照食粵鹽奉有

俞旨嚴禁准鹽越販則是准粵疆界既明而東西兩運亟

當照復查南贛吉參府遞年額引壹萬捌千道當茲粵餉告匱似應責令參府州縣嚴杜私販按年完銷以足餉額他若湖廣衡永寶參府緣西粵向不產鹽

例資官運於東粵每年兩運共官鹽柒萬壹千肆百陸拾叁包係從東省水客場買鹽回抽納備應茲值鹽客稀少難盈舊額議暫每年壹運粵西循例措辦鹽本赴東比照時價隨鹽多寡領運俟客商輻輳即照原數此亦因時制宜惟是官運鹽本舊例原措辦於西粵續議於東粵協濟廣西梧州兵餉兌抵今東

粵額賦兵餉歲缺數多誠難舍已芸人合候西粵撫
按查酌舉行庶公鹽不致壅滯臣部覆

准查粵東粵西鹽法業經該省撫按與兩淮鹽臣議奏照
食粵鹽其所用鹽本并壹年兩運已經臣部覆按臣
趙之麟題請

勅廣東巡按會同廣西撫按酌議具奏到日另覆今該撫
疏稱江西南贛吉參府通年額引壹萬捌千張責令

參府州縣按年完銷應

勅廣東巡按年終查明完欠分数同廣東各州縣一體照

例考成

一順治拾陸年閏參月廣東巡按御史趙之麟題稱粵
鹽之行於楚也原自粵西出給鹽本赴東省買運其
來舊矣今廣西按臣田昇龍移稱西省措本維艱議
令東省水客自備資本運鹽來西搭配而行臣查鹽
書水客往場買鹽回省兌商從無水客徑自運賣之
例再四思維無如着令梧商赴廣領買倉鹽回梧轉
輸俟兩粵寧謐方議設復官運臣部議得鹽課關係
軍需其已前作何運行今又何稱着令梧商赴廣領

買倉鹽請

勅廣東巡按并廣西撫按會同確查據實具奏續據廣東
按臣張問政疏稱廣東之鹽行於西省之桂林等處
以及楚之衡永寶參府歲該梧州拆散額引壹萬捌
千道外又有官運鹽柒萬壹千餘包此舊例也今梧
州之引歷年所銷不及原額之半而官運之鹽全缺
是以欲令梧商領買倉鹽者以為裕餉至計乃梧商
皆屬流寓之人又不能承買倉鹽必係私販盛行之
故乞

勅粵西撫按二臣會同湖南撫按將衡永寶接連長袁地
方嚴分疆界杜絕淮鹽攬越臣部覆

准查順治拾肆年伍月內廣西撫臣于時躍題為敬陳鹽
政壅滯之由壹疏內稱衡永寶屬仍照往例盡食粵
西鹽淮鹽不許越境私販並請

勅嚴飭禁止奉

旨遵行今廣東按臣以淮鹽攬越衡永寶以致東鹽阻滯
相應再行沅撫嚴行申飭禁止如有淮鹽越販等弊
即行嚴拏重處至稱歲額虧欠該按仍當會同廣西

撫按作速設法酌量行鹽以足舊額不得彼此推諉
致悞

國課

一順治拾陸年柒月廣東巡按御史張問政為謹陳鹽
政積弊祈

嚴飭以甦民困題稱粵東歷年鹽課餉額所完之數尚不
及半推原其害皆由官商居利以客商而行營勢之
威帶弓張旗與職官分庭抗禮巨艘連艚有司不敢
過問引縮包浮關廠莫敢稽查彼其往場買鹽也告

票拾無壹貳水客之額虛懸及其回廣也報稅拾無
貳叁盤驗徒為故事至其到埠發賣高價勒買一任
施為甚而計口數丁不論貧富壓派食鹽稍有還價
稽遲則壘利加筭又或指為私販或誣為私買肆行
詐害未呈告於官府先細打於私家嗟彼愚民蕩產
傾家繼之以性命耳惟祈

天語申嚴為粵東特立一令將一切官商盡行革去其名
色總謂之民商編名造冊達部分埠認餉按納不許
張旗鳴鑼要與民商一例見官不得抗禮使所載船

隻往場一照水客告票鹽包一照民商盤驗額餉一
照民商依期赴納未完一照民商追比不得以營勢
而阻撓

國法不得以營勢而欺壓小民指詐私鹽者倍治其罪
引外夾帶者照律究罪私鹽入官充餉肇慶峽之厥
綦嚴清遠縣之盤亟復委以方面監司將此貳處關
津極力清查庶幾積弊少清而軍需或可漸裕耳臣
部覆議商人行鹽俱止稱商人並無官商民商之分
此商係何人所招官商名色係何人所給至廣東引

之
日於拾參年發行今告票一節係何官違禁所行其
商人指借官名立旗掛牌橫行於拾肆年奉有嚴拏

旨今為何不行查拏題參請

勅該撫按逐一清查指名參處又聞津隘口乃鹽包經由
之地自應盤驗向未舊例係何官兼理已前作何查
驗併行查明奏報續據該御史題稱粵省初經恢克
之時土著民商流離逃竄藩鎮之下乘便貿易納餉
行鹽出於藩下者為藩商出於鎮下者為鎮商而總

其名曰官商實未嘗有人給之者至其帶弓張旗鳴
鑼納喊相沿成習於是有抗職官而威闕廠高鹽價
而虐小民如宋襟湖徐茂霍悅昌諸人者臣已列疏
糾叅即賊惡未著而藉營勢雄行者亦皆屏而去之
易以民商庶官商之名色釐剔殆盡而官商之害亦
為之少清矣若夫水客告票與埠商拆引原自不同
蓋歲中部頒引目原給發與各埠賣鹽商人至水客
往場買鹽例在鹽道告領票照赴場買鹽回至虎門
寨驗截旗票方准入省告盤照例輸餉然後兌商拆

引運賣鹽書刊載而行並無違禁創舉至所稱肇慶
峽之廠綦嚴清遠縣之盤亟復者臣以粵東行鹽之
路由北而上則經清遠由西而上則經肇慶舊例清
遠之盤屬之縣官肇慶之廠府廳輪管臣請重以監
司清查者以肇慶則有分巡嶺西道清遠則有分守
嶺南道可以就近兼理但今官商既革有司絕庭抗
之跡民商畏法拆引鮮夾私之行外此而大艘私販
府廳縣皆可得而執法以挈獲闕廠盤驗可以循照
舊例而行仍

請責成道臣不時親加稽察俾上下凜飭庶幾私載莫能
飛渡矣臣部覆

准查官商宋襟湖等已經題參至告票一節備查鹽法刊
書原有水客告票之例俱不必再議至肇慶清遠貳
處閩津據稱官商既革民商畏法府廳縣可以循照
舊例而行

請責成道臣不時親加稽察相應允從更請

勅該按臣嚴立考成之法每年該餉若干已完若干未完
若干年終分別完欠照例考成其官商名色自當勒

石大書永為禁革仍不時緝訪務期鹽盡一清以裕
課額

一順治拾柒年貳月廣東巡按御史張問政題稱海鹽
道督徵鹽課司與各府縣場課共壹拾貳萬陸千零
貳拾叁兩零係全書額餉連年照與民糧歲參列入
考成外而各府閩橋稅餉銀伍萬叁千伍百叁拾叁
兩零則附載行鹽經制之內合而計之共有壹拾柒
萬玖千陸百兩零之額但閩橋廠稅一項皆約引計
徵如消引稀少則難按額取盈以致從前鹽道不入

總數計算分数且查民糧歲叅皆照全書額徵完欠以定各官之考成今鹽課叅冊似應循照全書額徵實數造報其附載行鹽經制銀伍萬叁千伍百兩零之額原不載全書自當冊後註列臣部覆

准查閩橋廠稅雖屬雜項銀兩各運司考成不論正雜鹽課應皆考成請

勅該按將閩橋廠稅餉銀嗣後如有未完即按數一體考成

一順治拾柒年拾月廣東按臣張問政會同總督李棲

鳳巡撫董應魁題稱粵東順治捌年分起至拾伍年止積欠鹽課數至伍拾貳萬追呼無路情法難施官聽叅罰究未能帶徵分毫援民糧蠲免之例題請

恩恤臣部覆

准查鹽課錢糧與民糧不同蠲免之例似難准行查兩年帶徵為時已過尚未徵解分毫軍需何賴應請

勅該撫按於拾捌年起叁年內設法帶徵以清積逋

一順治拾柒年拾壹月廣東巡按御史張問政為特陳鹽餉逋額之由乞專責成題稱粵鹽歲頒額引伍萬

玖千捌百零捌道設埠行銷於本省者壹萬伍千壹
百柒拾捌道散拆行運於鄰邦者肆萬肆千陸百叁
拾道鹽多行於鄰邦而考成獨擔於本省者甚非持
衡之平也鄰邦不與考成原可聽其壅滯而不顧無
怪乎歷年之散拆引餉虧逋莫挽立法未當使本省
之司釐者受叅受罰固不必言其如

國餉之逋積何此際大須釐正今南雄散拆壹萬捌千
引行於南贛吉參府者責令參府并南雄之保昌壹
縣照額分派各縣歲終冊報以定考成使完欠各有

崇責誠補偏救弊法莫善於此者外梧州散拆壹萬
捌千引行於廣西壹省及湖廣之衡永寶參府連州
散拆肆千肆百叁拾道除貳百叁拾引於連山縣銷
售外實計肆千貳百引自連州壹州以行於衡之臨
武藍山貳縣韶州散拆肆千貳百道自樂昌壹縣以
行於郴州壹州及宜章一縣九此參路散拆皆照江
西南贛吉參府之例同粵東州縣一體考成俾責任
既專則督銷自力而課餉可從此而漸裕矣臣部覆

准查鹽引關係

國課凡銷引州縣歲終考成此定例也查粵西及衡永寶參府等處向緣地方未定故未議及考成今地方鹽法既以通行而粵東撫按議將粵西州縣及湖廣衡永寶參府所屬與連韶臨武藍山郴州宜章各州縣均屬江西南贛吉參府之例同粵東一體考成允宜舉行應

勅湖南粵西撫按應自拾柒年為始申飭各州縣遵行

一康熙元年拾貳月廣東巡撫盧興祖為鹽多無地銷售酌議疏銷之法題稱粵地鹽課南雄額引壹萬捌千道由保昌壹縣達之江西南贛吉參府地方因商名散折引無定埠莫任督銷以致汀淮私販攬行粵鹽壅滯引壅餉訕前撫按二臣議將壹萬捌千引題

請責令南贛吉參府屬各官與粵官一體照例考成覆奉俞旨咨行遵照業經咨會江西撫臣及南贛撫臣將參府屬貳拾伍縣與保昌壹縣分派督銷矣乃連年以來江省商人買運不前各官督銷勿力或稱鹽斤重而難銷或稱戶口殘而無力勢有難行臣據事籌度因思疏銷之法議改南北分運而引亦分銷南北各引

致千道共足壹萬捌千引之餉南商折引致千道在
鹽課提舉司每引照例納引目餉銀叁錢零叁釐餘
鹽包牙稅銀伍錢玖分玖釐叁毫引紙水腳銀貳分
肆釐清遠廠納包稅銀捌分肆釐南雄軍餉銀玖錢
太平橋包稅銀壹錢肆分其鹽由省運至南雄貯候
北商至雄接買北商在雄折引致千道亦照例納引
目餉銀叁錢零叁釐餘鹽包牙稅銀伍錢玖分玖釐
叁毫引紙水腳銀貳分肆釐清遠廠包稅銀捌分肆
釐南雄軍餉銀玖錢太平橋包稅銀壹錢肆分其鹽
在南雄接買運回江省參府地方發賣蓋名則折壹
萬捌千之引實則行政千引之鹽如此鹽斤既減江
省易於銷售引既半減江官無所推諉此減斤銷引
之法所當隨時變通者也至於考成宜均乃垂經久
在北商致千引運回參府屬與樂昌壹縣各照戶口
減原引之半督銷仍責成南雄府督運其南商致千
引雖責南商認納但係轉運之鹽無別官可督應令
鹽司官督銷考成庶責成既專督銷自力汀淮之私
販可杜粵省之轉運無滯臣部議覆查南贛吉參府

額引壹萬捌千道向來各處所納餉稅俱有定例今據疏稱將引分與南北貳商令其兩處納課是兩引止行壹引之鹽壹引而納兩引之課名則分引以便考成實係減鹽倍增課稅民艱食少私販必多未便准從相應

勅下該撫速為造報考成不得借端遲延

一康熙貳年正月廣東巡撫盧興祖為省運首無稽核奸商夾帶可虞請嚴行秤掣題稱粵省鹽例係水客納餉往場運回省城河下然後轉兌各埠及雄梧等

商鹽課司提舉居省收餉發引各照地面運賣詎省會河下舟車叢雜之地其水客之已到而聽兌與埠商之告兌而轉行此際漫無稽察奸商藉引影射私兌私販官私並行其弊實多蓋省會首為鹽斤轉運之地發根之所源之不潔流何以清今必離其地專其官居衝要而秤掣始免夾帶之弊况粵東省河皆係巨流茫津支派雜出萬難稽察則擇要地責專官中途秤掣之法所宜亟講也臣因度量地勢凡在省兌運之鹽分行各埠而經由之路則佛山最為衝要此地距省參拾里今各

處埠商凡在省納餉兌鹽一畢俱令商船前赴佛山灣泊聽駐防官秤掣包斤與引數相符具報然後放行或臣不時親赴抽掣或令鹽道等官前赴抽掣其不由佛山者為數無多聽臣查明運道扼衝之處委官秤掣凡有掣出溢斤在正引之外者請照准鹽割沒之例以懲夾帶但淮商貨厚而粵鹽售價頗輕今議每斤罰銀伍釐聽臣細加察核年終彙冊題

報如有奸商巨賄不遵盤驗與掣出夾帶過多者臣更不限常法特疏指叅嚴加懲治此在省會附近言之也

此外尚有肇慶等府橋廠臣慮鞭長莫及并

請通飭各橋廠榷官務要一體嚴加秤驗照例而行其有狗縱不舉不報臣即將所司職名據實

題叅庶夾帶之弊可除而正引之鹽無滯矣臣部覆查順治拾叁年廣東巡按張純熙題嚴定盤驗壹疏內開以後各船商鹽照舊齊集定海門外務照點定艙口徹底秤掣商人水客伍日限完又題為埠商截角壹疏內開照舊用關防截角繳查臣部俱經請

旨嚴行申飭遵行在案今該撫疏稱佛山既係要路自應

秤掣但定海門外是否仍行秤掣埠商旗票果仍照舊截角繳查疏內未經說明難以遽議請

勅該撫查明具題於本年拾壹月隨據該撫覆稱粵東鹽課遞年官引多懸額餉告訕豈盡奸民之私販實慮奸商之夾帶尤多也查鹽產於各場水客販運回省轉兌埠商雖前經立法各船集於省城定海門外彼此均有告盤但省河舟車叢擁營頭紛雜且海汊多歧或未告盤而先運或借經盤而影射故事徒循私帶不絕臣揣其弊因求杜絕之法查佛山距省參拾

里一線小河為入省通津之路東粵西北南參面與西粵江楚行鹽皆經此河故建議於此端官秤掣包斤查驗引票數目相符然後具報放行使其在省有私兌私販之奸中途有港汊走險之弊必不能飛渡佛山而過者今定海門仍行盤驗旗票仍照截角此舊章不易而佛山秤掣者無亦因其弊而求詳於禁飭耳臣部覆

准應如所請於佛山專委壹官以司秤掣掣出溢斤每斤罰銀伍厘於年終奏銷之時將委官姓名罰銀數目

另冊造報仍令該撫嚴飭委官不得藉端需索病商
一康熙貳年正月廣東巡撫盧興祖為請嚴責緝之令
以絕私販題稱粵東自恢克之後兵棍交橫冒營私
販有司不敢問鹽法之壞莫可紀極臣接部咨恭奉

上諭通飭倚勢販鹽嚴加稽察隨轉行申戒其如粵東幅
幘最廣若高雷廉瓊潮伍府地屬斥鹵設有場灶皆
就地行鹽原無引日內廣州府則有客商納餉運賣
潮州府則有納稅過橋而廣肇惠韶雄伍郡羅定壹
州則立埠派引埠商行鹽乃捕巡衙門積弛成錮竟

於私販相忘矣臣因設立循環比較功次然積弛之
後極重難挽責力於捕役固已飭厲而端督於當官
亦所宜嚴查原經題定凡有私販地方官失於覺察
致人告發指名題叅首告一次二次降級戴罪三次
革職為民處分之例誠嚴但此蓋為有告發而後處
分也倘責緝不嚴告發者少與無告發則公私交混
而地方官亦聊幸無事優游處之而私鹽為困為販
有不脫漏者乎則各府州縣捕巡衙門原有緝私之
責者猶當嚴定則例以繩之臣請於府州縣捕官及

各巡檢司官按季課程如該官肆季獲有私鹽巨圍
巨販拾起以上者聽臣彙查

上聞如緝獲不及數者附過若竟無緝獲聽臣年終彙查
題參嚴

請處分以懲積玩至緝獲鹽斤臣即附疏題報再照地方
責緝向來文武並行今職掌攸分各不相轄而與販
巨夥多有假營威而抗捕緝則凡捕巡等役遇有冒
營私販不問水陸汛守之兵須協力擒拏以免拒脫
如有坐視不應查實究懲祈

勅提督臣一體照行臣部覆

准查先經臣部題明道府州縣地方各官不能嚴緝私販
失於覺察被人告發及營兵販賣私鹽該管營官失
於鈐束被地方官民拏獲壹次貳次降職戴罪緝獲
被首叁次革職為民通行在案今疏內既稱有巨夥
與販冒營私販應請

勅下提督如有前項犯販該管營官不行緝拏許該撫并
提督指名題參一併議處

一康熙貳年柒月廣東巡撫盧興祖為查復爐煽以盡

鹽政題稱粵東鉄爐曠廢缺餉者殆非壹日自前按院
題報部覆行查據潮屬鎮平揭陽平遠大埔程鄉等
伍縣每縣各煽爐壹座與各地方相安查潮府全書
雖未列有爐座之數然有統載礦額銀壹千兩之餉
納充該府縣兵食又東安壹縣全書原載鉄爐陸座
今據報有現爐肆座其聖較橫逕貳爐未便開煽西
寧壹縣報有貳座廣屬之龍門現爐壹座惠屬龍川
縣伍座俱查與地方無碍至清遠壹縣據報地方不
安總之鉄爐之復原求無病於民有益於餉倘經州

縣查勘與地方無碍者均應聽其開煽若以按以全
書原定之數強求足額誠慮地方今昔不同未便過
執如羅定等處雖全書有載及前院原題疏內海陽
等處或因盜賊嘯聚不常未便開煽或因木盡礦絕
例應移爐目前均應停止另酌修復臣部覆查鹽法
考載廣東提舉司兼管鉄稅每鉄壹萬斤納軍餉牙
稅并增鹽稅共銀肆兩肆錢每年約伍千餘兩又賊
罰銀約肆百餘兩今稱見開納餉爐壹拾柒座並無
鉄斤餉銀數目應

勅該督撫查明見爐壹拾柒座每年共煽鉄若干斤計納
鹽司餉稅若干兩在各府縣另納餉銀若干兩造冊
報部查核於康熙伍年貳月據該撫王來任疏稱爐
餉一項爐商在各府州縣地方山場開爐煽鉄則於
該府州縣輸納爐餉迺年在雜稅內彙冊奏銷鉄稅
一項鉄商在鹽道鹽司告票往各山場販運鉄斤則
於鹽課司輸納鉄稅贓罰一項則鉄商告票往場運
鉄違限罰贖迺年例俱在鹽課內
奏銷但粵東各爐自順治捌年起至康熙貳年止前報

爐拾柒座續報惠州府爐伍座共貳拾貳座其漏報
年分不開鉄斤俱經查明添造與爐餉鉄稅並列在
冊又查羅定州平遠程鄉東安鎮平揭陽各縣原漏
報西涌橫水等貳拾貳座雖各爐開煽久暫不常然
煽爐有餉運鉄有稅絲毫難容隱匿今俱開明另列
壹冊至贓罰一項據司道各官疊詳客商稀少依限
回銷並無罰贖臣部覆

准查粵東爐餉一項額銀壹千壹百肆拾陸兩柒錢伍分
載在全書歷年與雜稅內

奏銷其餘爐座餉銀數目全書未載應令該撫造冊送部查核至於鹽司所轄鈇稅并贓罰銀兩查順治拾捌年以前積欠已經入於催徵不得鹽課案內蠲免再查鈇稅既無定額贓罰銀兩據稱並無罰贖俱不便入額考成以後應令該撫另造清冊報銷每年取各官印結送部查核不得再有漏報

一康熙貳年捌月廣東巡撫盧興祖為鹽引外省督銷府官考成無涉題稱廣東南雄鹽引壹萬捌千道內保昌縣引肆百玖拾肆道其餘壹萬柒千伍百零陸

道則屬江西南贛吉參府屬各縣督銷韶州西河鹽引肆千貳百道內樂昌縣引柒百道其餘參千伍百道則屬湖廣柳州宜章永興興寧等州縣督銷向皆散拆商無定名故歷年歲參冊雖載南韶貳府官職名皆不計分数不列疏叅也嗣因拾柒年歲參部覆俱無未完分数致拾捌年照奉開列耳但江楚貳省各官悉已奉

旨一體考成是兩路額引之留於粵者已有保昌樂昌貳縣官肩其督銷任其考成則江楚貳省之引誠與隔

省南韶貳府官無與也並應免造職名分数而江省額引之考成統在江省之官楚省額引之考成應聽改食淮鹽之案而定者也臣部覆

准查江西南贛吉參府原食粵鹽其引即在南雄府壹萬捌千道之內又湖廣郴州宜章等州縣亦食粵鹽其引在韶州西河肆千貳百道之內其銷引考成自應責之州縣各官今南贛吉參府并柳州等處引鹽雖由廣東南韶貳府經過既不督銷江楚引目應如所請免其考成

一康熙貳年捌月廣東巡撫盧興祖為鹽課歲有考成兩叅似非協例謹

題明以別職掌題稱粵東應徵鹽課鈔稅與應銷鹽引督徵原屬海鹽道職掌經徵則屬鹽課提舉司以及州縣各官歷年照例造冊列疏

題叅固有寬假乃遞年藩司歲叅民屯本折錢糧又將鹽鈔併入其內由是鹽課之款壹歲兩叅司鹺之官壹歲兩罰雖鹽課關係軍需督責務求其嚴第考成須臻畫一職掌各有專司今應免民糧之重叅而遞

年歲叅一照成例統歸鹽道者也臣部覆

准查該省鹽課考成每年歲叅又復造入民屯錢糧冊內
叅罰似為重科今既經該撫題明以後經管鹽課銷
引各官照例另行奏銷考成每年藩司歲叅冊內不
必重造

一康熙參年伍月刑科右給事中張惟赤為商稅隔省
殃民派賠弊由奸蠹謹據確聞糾叅題稱臣聞粵東
太平廠鹽課貽累江西吉安府小民賠納難支即廬
陵壹縣包課銀壹萬壹千柒百陸拾餘兩小民受包

賠之累又稱廣東太平廠額引不過壹萬捌千引今
江西吉安府派壹萬肆千叁百引零豈吉安壹府可
當粵東全省乎吉安壹府預加鹽課參萬肆千餘兩
廣東海鹽道票令江西百姓或赴粵包賠或招商領
引明令江西小民代廣東商人包稅臣思小民止應
食鹽銷引計口有數若領引辦課乃商人之責今以
江省之民辦粵東之課無鹽可領而有稅硬派至參
萬餘兩之多抑勒派輸江省荒瘠之區豈堪承認况
向來比照淮例每丁每年只食鹽拾斤零捌錢今本

年忽加派每丁食鹽捌拾貳斤是又壹丁而代捌丁之課究恐民力重困而額課終不得完乞

勅戶部嚴飭該省督撫詳加察議將此項課銀仍責南商輸納并申飭粵省督撫從公酌議大加整刷使國課有所歸着臣部議覆查江西南贛吉參府地方係食廣東之鹽其廣省所納軍餉引課稅銀即在廣東經制之內自應廣商辦納原無江省百姓包納鹽課之例今科臣疏稱無鹽派稅等弊請

勅江西粵東各督撫確查南贛吉參府曾否領粵東之引

課銀是否江省民間包納每引課餉在廣東經制該銀若干逐壹據實明白具題於本年拾貳月隨據江西督撫張朝璘等會疏題稱南贛吉參府民食粵鹽起自故明不過壹時權宜之計遂相沿至今查當日行鹽規例粵東辦課運鹽至雄聽參府商民不論多寡拆銷民無拘定官無考成迨至順治拾柒年始行計丁坐引派銷以淮例較之壹丁而食捌丁之鹽壹人而包賠捌人之課在南贛派引不多且接壤粵境仍食廣鹽無容更議惟吉安壹府距粵千餘里更有

拾捌灘之險商賈累足民多淡食請以康熙參年為始改食淮鹽仍照粵額完課再查吉屬包賠粵課節年未完甚多今既議行淮鹽從前粵省虛課應否概賜豁免臣部議覆查江西參府經制額引壹萬捌千道原食廣東之鹽於順治拾伍年間題定責令參府州縣按年完銷一體照例考成從無派令百姓包納鹽課之例今派引而無鹽強令百姓包納鹽課有違成例係何官所行前疏原令江西粵東督撫確查參府曾否領粵東之引課銀是否民間包納今未會查

明白遽為具題反稱吉安府距粵千里議令改食淮鹽又將參府從前虛課欲請豁免且該撫所造冊內節年未完引數與粵東省奏銷之數反少是何緣故仍請

勅該督撫會同粵東督撫確查題報於康熙伍年貳月又據江撫董衛國會同該督即廷佐題稱查粵鹽原係粵商納引運鹽江西發賣官無考成民有便益後因粵商無鹽赴江其稅餉仍不可缺未免累及粵官歲叅至順治拾柒年間始興派銷之議而取江西參府

丁口數目

題請江官一例考成但吉安壹府距粵千有餘里派引獨多又無商鹽發賣引從何銷此課責之官賠食俸有限勢必均派於民故不得不包賠乾引以副考成仰懇

俯從前議南安贛州貳府仍行粵鹽遵照順治拾捌年以前舊制引斤數目令粵商辦課銷引運售引內載定南贛字樣不致商人避遠就近吉安壹府改食淮鹽請

勅兩淮管鹽諸臣令坐商遵照淮例辦課運售既食淮鹽仍足粵課一轉移間在

朝廷無缺額之虞在吉屬稱民情之便至查引課數目舛錯因江省冊報在先乃係陸續補解粵省

題報在後故有數目參差查無他弊而逋欠鹽課亦奉有

恩赦酌量蠲免之行今吉屬未銷虛引實難包納並懇

皇恩緊行蠲免又據廣東撫臣王來任題稱江西吉安府之食粵鹽也查鹽政考開載始於故明正德年間後

自嘉靖萬曆等年兩淮巡鹽御史疊據淮商爭議改食淮鹽而終成築舍者淮商欲利其行鹽之地吉安之民未有所願耳今日之吉安願改食淮鹽者粵東兩奉遷折邊界場灶坵墟粵民尚苦食淡鹽價倍於往昔以致吉安商人裹足不前而責吉安年銷額引故江西撫臣董衛國有改食淮鹽之請部臣議令臣等會同確查茲據兩淮鹽臣黃敬璣移稱淮南節年浮課頻加凋敝已極不能代運粵鹽代完粵課臣查吉安府每年應銷額引壹萬肆千叁百零壹引伍分

應納粵課餉叁萬肆千陸百伍拾肆兩伍錢零若改食淮鹽應除粵東此數雖於額餉稍缺然粵省近日產鹽無多而吉商又不赴粵承折其引終是積滯查吉安府屬康熙元年未銷引陸千伍百柒拾壹引肆釐玖毫康熙貳年分未銷引柒千柒拾伍引壹分叁釐康熙叁年分未銷引柒千肆百肆拾伍引肆分柒釐康熙肆年分額引壹萬肆千叁百零壹引伍分全未折銷課餉懸缺如許惟存紙上之虛名莫濟公家之實用且徒累各官考成究與粵餉無益再以江廣

道里相較粵中水客自各場販鹽運至廣東省下兌
商逆流運至南雄由南雄過梅嶺至南安方載運過
贛州抵吉安計程貳千陸柒百里而淮鹽自揚州至
吉安雖越歷江湖係一水之便計程壹千捌玖百里
在粵尤多壹嶺之隔且江西壹省大半皆食淮鹽淮
雖逆流其於吉安似覺較近鹽為民生必用之需課
係今日軍需之急與其兩相耽悞何如俯從民便改
食淮鹽但改食之議原係江西撫臣所請而淮商又
有不願之詞課餉豈宜中懸仍請

勅江西撫臣早為定議將改淮引餉作何銷納移會兩淮
巡鹽御史確酌題覆庶民生

國計兩有便益矣臣部覆

准查南安贛州貳府與粵相近應照舊仍行粵鹽令粵東
鹽官督責粵商納課載定南安贛州貳府字樣運鹽
至南雄府江西州縣官招商往雄買鹽赴州縣行銷
不得再派小民包賠至於吉安壹府據稱道里遠近
險易自應改歸兩淮但兩淮御史又稱淮商不願代
粵運鹽自難強其認行請

勅江西廣東各督撫會同兩淮巡鹽御史確酌另招商人
改食淮鹽再查吉安節年欠課既經粵撫查明在禁
海缺徵課銀內具題蠲免自應准蠲

一康熙參年伍月廣東道御史李秀題稱廣西廣東今
巡方已撤撫藩正項考成尚多缺少其於鹽課雜稅
豈能盡力徵收將來經營各官多少任其開報撫藩
實難稽核今兩省鹽雜貳稅每年約有拾數萬餘乞

勅部查照各省例差遣專官住劄肇慶梧州貳府督理臣
部會同吏部都察院覆

准查兩淮兩浙長蘆河東等運司鹽法舊例專差巡鹽御
史督理其兩廣雜稅巡按未撤之時原係巡撫督理
至於廣西廣東福建四川等省鹽課事務向係巡按
兼攝自順治拾捌年肆月內議政王貝勒大臣九卿
科道會議將巡方撤差之後其鹽課歸併巡撫兼轄
如額課不完俱有處分之例况今福建四川雲南貴
州等省鹽課亦俱歸巡撫兼轄其廣東廣西差遣專
官母容再議

一康熙參年伍月廣東巡撫盧興祖題稱粵東沿海居

民先奉

上諭遷入內地其無徵鹽課等銀行臣照數攤派於見在
各場徵解臣即備移各府州縣按額照徵及議攤派
各客商辦納間隨有埠商具控請豁復有告退苦情
但思今日課餉之缺實出於禁遷使然非關催征之
不力如水客軍餉一項在昔未奉海禁鹽運疏通之
時猶且缺額不足矧今奉禁森嚴片帆不容出海鹽
艘廢棄水客潛踪此軍餉之缺額萬難派徵者也又
各埠以及南梧連韶肆路引餉一項專藉各商折引

行鹽以足課額今則海禁場遷無鹽可運引憑何銷
徒致缺額空懸無商可問此引餉之缺額萬難派徵
者也至於場課一項係藉灶丁煎鹽辦納今則丁遷
灶徙場屬坵墟煎辦無人灶戶流散此場課之缺額
萬難派徵者也閩橋廠稅一項悉賴各商運鹽經過
按包抽收鹽多則餉裕鹽少則餉詘自康熙元年參
月海禁之後鹽少商稀渡閩過廠者寥寥無幾此廠
稅之缺額萬難徵解者也今原行江楚西粵各路之
鹽閩橋權稅亦因之並詘共計缺軍餉引餉場課閩

橋廠稅銀柒萬壹千壹百兩零是粵東較之淮浙迥有不同攤派之議誠難取裕乞

念粵東遷剩灶丁痼瘵殘商將前項遷場禁海缺額課銀照民屯錢糧一體蠲豁免其攤派臣部覆

准查沿海居民奉

旨遷入內地其粵東福建兩浙參處近海鹽場灶丁俱有遷徙前閩粵貳撫及巡鹽御史將無徵鹽課題請除豁臣部議於各場各商照數派徵續據閩省督撫將商絕灶困難以補徵情由具題覆奉

俞旨免其補徵在案今廣東省無徵鹽課餉銀據稱海禁場遷商絕灶散凋殘艱苦實難比淮浙之例攤派題請相應將該鹽司所屬并廣州等府州縣所轄拾陸場遷徙無徵銀柒萬壹千壹拾伍兩零免其攤派

一康熙參年拾月廣東巡撫盧興祖為請定崑轄考成題稱粵東鹽引有行於江西南贛吉參府者有行於廣西全省及楚屬衡永寶參府者每年歲報考成則隸臣衙門核造蓋以所運銷者粵東之鹽課造者粵東之冊稽核稱便法非不善乃查舊制江省及西省

貳處之引原屬散拆自順治拾柒年間定以考成於
是兩省之官狃於故習奉行不力考成屢悞臣經前
後

題叅然查粵西考成今猶未定江省南贛吉參府有報
有不報參差未齊溯自順治拾柒年以來雖有考成
之

令甲未獲考成之實效况粵西撫臣原兼鹽法合將江
省粵西銷引考成

勅兩省撫臣就近綜理每年將所屬州縣計其完額依例

奏報遲者題叅則各屬諸吏壹見考成在於本省其
趨事恐後之心自加凜惕不惟歲報如期而且轉運
益速臣部覆

准查廣東省每年額領伍萬玖千捌百捌引其江西南安
府贛州府吉安府及廣西全省銷引俱在前疏之內
因其所食俱東省之鹽故考成之冊例於東省造報
今東省之鹽雖行江西廣西地方其考成東撫綜理
行之年久仍照舊例遵行

一康熙肆年貳月廣東巡撫盧興祖題為兼轄有不及

之虞請

勅詳查以重鹽法考成題稱臣屬鹽引一項江西廣西貳省俱所行地面經制考成歲以為例督銷鹽引有完未完乃貳省之官陞轉離任從未有報粵東壹文者則既陞離任萬一有督銷鹽引未完之數或經歲報或奉部查事後追詰必加議罰問本省之督撫自以鹽引不及知為辭若問兼轄之微臣則陞轉實不曾申報以此相持必有意外之譴不能辨別者矣嗣後請

勅該省撫臣特加詳核或完或欠務相咨會庶臣得以按額稽查凡有未完照例咨留俾免違悞臣部覆

准查廣西壹省及江西南贛吉參府俱食廣東之鹽州縣官俱有銷引考成之責應請

勅兩省巡撫嗣後凡有督銷鹽引州縣官離任者務須咨會粵東巡撫查明全完方許離任如有未完之官不行咨會明白離任者應將本省巡撫照

題定未完錢糧例議處

一康熙肆年參月廣東巡撫盧興祖題稱粵東自順治

捌年起至拾柒年止積逋鹽課閔橋稅餉查係歷來客商稀少灶丁死徙逃亡課餉既無權稅遂詘臣於欽奉

上諭一案查將催徵不得情由併題

請豁部覆以鹽課非係地丁之賦難以蠲免仍應催徵查積年逋欠正雜課餉共銀捌拾伍萬伍千貳百柒拾兩零自昔至今商經更易向以地方荒殘河道梗阻肆路散折不行灶戶流離靡定行商一過莫可追詰以致積欠難完懸額有日今以現在寥寥數商行壹

日之鹽始輸壹日之餉實非舊日河商豈可責以重負加之拆邊禁海丁遷灶棄順治拾捌年缺額又欠銀貳萬玖千伍百伍拾參兩陸錢零是近年現餉猶不能輸已往舊額安能催問縱使官官褫斥日日追比究無補於分毫額數徒懸悞餉不小乞俯鑒粵東地方殘荒真苦課餉積逋實係無徵

勅部議豁臣部以該督撫未分地方真苦俱稱催徵不得槩行請蠲不便准行仍令見任各官催徵奉

旨據奏稱自順治捌年以來積欠鹽課錢糧責令見任各

官催徵節年積欠錢糧應否仍行催徵爾部再議具奏
又於本月初五日奉

恩赦內一款鹽課積逋催徵不得者著察明亦准酌量蠲
免應將該省順治捌年起至拾捌年止未完銀捌拾
捌萬肆千捌百貳拾叁兩零遵奉

恩赦照數蠲豁

一康熙肆年陸月廣東總督盧崇峻為遭民失業堪憐
仰祈軫恤題稱粵東山川形勢大約窄於南北而長
於東西其東西延袤殆肆千里而靠北一帶山縣土

瘠向少稻梁之田靠南一帶水沃田腴兼有魚鹽之
利故粵之素號殷富者資於南之海濱而不在北之
山陬也乃自奉立邊之議一遷於康熙元年膏腴去
其半再遷於康熙貳年沃壤去其全以億萬之衆失
其田舍而遷居內地是非地方官所能家至而戶恤
之者雖加意安插而無米奚炊其困苦一也貿易無
資墾荒無力其困苦又一也且界內即有荒田可墾
而拋荒者皆是硠瘠之地用力多而刈獲少捌口艱
食其困苦又一也何以謀其朝夕乎惟有魚鹽一項

取之甚易而其利最普則為遷民謀生之計莫是若
矣况遷民俱係沿海而居則魚鹽尤其素業若以魚
鹽資其取辦則田舍雖失而素業猶存乃今片板不
許出海捕魚之業已禁絕矣止熬鹽之事先因

國課係乎軍需民生不便淡食故勘海公疏議定出入
熬鹽口子通省僅得肆處惟廣州之茅洲墟潮州之
達濠埠惠廉兩府之鹽田村耳非此肆處不許出界
熬鹽此為禁絕通販計固不得不爾也然以肆并延
袤之廣欲遷民併聚於肆處則不可欲各地散居之

民千里赴口而出辦則又不能是

皇上之恩允煎鹽以為

國課民生計者僅便於原附肆處之居民耳以致邇來
鹽少價騰伍倍於昔而引壅課誣日甚於今不幾軍
民交困與臣思立邊畫界原為禁絕通販今熬鹽之
令止許單身往煎則鹽從外入米無內出似又不必
拘於肆處口子矣惟在嚴立禁令俾伍長互相保結
頭目用心稽查事發連坐則隨地俱可煎鹽亦不至
有妨禁令也乞念遷民失業之苦救恤別無長策准

令不拘肆處口子許其隨地熬煎則永濟億萬遷折
之殘黎且使通省食無窮之鹽利臣部查勘海立界
事屬兵部當日議留煎鹽口子肆處臣部未經議覆
今該督疏稱遷民失業堪憐議令隨地煎鹽等語應
請

勅下兵部議覆續經兵部覆議得廣東沿海地方立界已

撥官兵嚴守今若准該督所請隨地俱可熬鹽恐通
海生事亦未可知相應不准

一康熙肆年玖月廣東巡撫盧興祖為引課兩受叅罰

查例具疏題明題稱粵東鹽課一項合灶丁之場餉
水客軍需商人引餉皆鹽道鹽司二官督徵每年造
冊考成若引目則分派各州縣照埠按數督銷其不
及額者責在州縣而非道司之不力也乃相沿歲報
引目考成並列道司二官兩受叅罰臣查督徵鹽課
與銷引行鹽同為此餉本無二項額課不足道司之
咎額引不銷尚在州縣嗣後歲叅引目免列道司二官職
名以豁重叅之累臣部覆

准查各省運司止有鹽課考成其銷引考成責在州縣惟

廣東省造報銷引冊內向列道司二官考成嗣後應照各省運司例止造鹽課考成其銷引免造職名

一康熙肆年拾月廣東巡撫盧興祖為隔省歲報遲滯請更定期限以便遵奉題稱粵東之鹽行於粵西全省江西南安府贛州府吉安府湖廣衡州府永州府寶慶府以及郴州宜章等州縣銷售而考成隸於粵東乃隔省移造督銷完欠數目往往逾期不至或參差不齊或全未造報又行補參殊瀆

宸聽請將參省鹽引歲報及干鹽政案件者於本省定限

之外俯寬參個月臣部覆

准查粵東鹽引行銷於參省地方每年奏報銷引考成有

未到州縣俱令補參章奏實繁以後關係參省銷引

奏報俱於本省定限之外照瓊州府例寬限兩個月

一康熙肆年拾月廣東巡撫盧興祖題稱粵東鹽課康

熙貳年奉文再勘遷界缺徵銀壹萬壹千叁百伍拾

玖兩零業經題覆請豁其石橋場原為蘓逆所踞該

年課銀實無徵解今經勦蕩盡屬界外無可復問臣

部覆

准查此項缺徵銀兩先經該撫彙題請蠲臣部覆令取具各官印結具題今該撫復又

題明應俟印結到日查明扣除又石橋場每年課銀柒百兩柒錢零今蘇利已經勦蕩其地既盡屬界外應准蠲除

一康熙伍年貳月廣東巡撫王來任題稱戶部咨查廣東省海豐縣石橋場未完康熙元貳兩年鹽課該撫原報奏銷冊內稱係蘇利徑自徵解今咨內又稱本場勘遷界外事關錢糧應令該撫查明具題臣查海

豐縣石橋場每年額徵鹽課銀柒百兩柒錢零該場原被逆鎮蘇利所踞鹽課銀兩節年荒殘無徵今蘇利既經勦蕩之後該場全在界外取有該縣無徵印結兩年課銀委難追問臣部覆

准既經該撫查明該場地 在界外相應免其追徵

一康熙伍年拾壹月廣東巡撫王來任為遵例考成鹽課題稱帶徵康熙元年分鹽課撫臣督催奉有貳年之限今限滿全完造冊題報臣部覆

准查未完鹽課銀兩先經該撫於道府鹽司帶徵限滿冊

內題報全完此巡撫貳年限滿全完之疏無容查議
仍請

勅該撫以後道府鹽司年限錢糧叅後如有未完其巡撫
應照

題定例貳年限滿造報處分如道府鹽司年半限滿冊
內已經全完其巡撫貳年限滿不必再行造報

一康熙陸年玖月廣東巡撫王耒任題稱新安縣鹽埠
額引陸拾玖道察其原承埠鹽俱屬生鹽給領引票
在於淡水場拆引回埠發賣船戶醃魚以完

國餉自奉遷移海禁森嚴船隻拆燬片板無存捕魚盡
已杜絕而鹽埠額餉委屬虛懸今康熙參年又值縣
地遷而再遷商散民逃前引實實遷缺該縣又係全
裁歸併東莞更無着落取具印結題請豁免臣部覆

准查新安縣埠既遷縣治已併東莞縣又取印結其新安
埠引陸拾玖道遞年額餉銀柒拾陸兩壹錢柒釐場
餉銀貳拾柒兩陸錢相應准其除豁

一康熙陸年拾壹月偏沅巡撫周召南為鹽課確有定
例混派實苦難堪籲懇

題豁以甦民困題稱湖南衡郴兩屬之臨武桂東等處
拾壹州縣地連楚粵邊未在萬山之中糧不滿數千
丁不滿數百窮困顛連之狀鄭圖難繪蓋山瘠地薄
不通舟楫人蠻俗鄙與苗徭處僅存其控制之名終
歲勤苦止有稻穀一種無可變通今粵東忽扳累各
縣認商分引聞者驚逃奔竄靡有孑遺茲因郴州宜
章永興興寧地近粵東樂昌縣舊例即以肆州縣買
食該縣西河埠頭商人鹽其桂陽桂東鄱縣地近粵
東仁化縣舊例遂以參縣食該縣成口埠頭商人鹽
桂陽州臨武藍山嘉禾地近粵東之連州舊例遂以
肆州縣食該州之新子埠頭商人鹽在粵商分楚省
拾壹州縣行鹽之利自有應納之稅在拾壹州縣就
食粵東興販之鹽自裕買鹽之稅是食鹽之民已寓
稅於買鹽之內而認稅之商早已浮稅於賣鹽之中
兩計其便前人立法未嘗不善今粵商見楚民食鹽
不豐覓利不厚乃欲牽連有司扳引認稅夫知縣豈
可作分引辦稅之商勢必責之於民民無資本興販
勢必家家報鹽商戶戶攢鹽本是明開縣官以加派

之弊而陰滋小民以朘削之苦違例擾害遺禍難堪
前此衡永寶參府已蹈此弊致地方重累荷蒙

皇恩准以淮商行鹽辦課民困得甦乞

一視同仁將衡郴數邑之民免其僉商分引仍令粵商照常行鹽辦課而數縣窮簷止寓稅於食鹽之中不特
弭官吏作弊之端而且除小民加派之禍臣部議覆

查衡州府所屬桂陽等伍州縣郴州等陸州縣舊例
既分食粵東省連州韶州貳路之鹽自應分銷貳處
之引非令各州縣另為僉商納稅也今各州縣節年

以來並不認銷引目推諉考成任意抗玩應請

勅該撫查明題叅仍會同粵東巡撫將節年銷引完欠數
目造冊報部查核奉

旨據該撫疏稱食粵商興販之鹽自裕買鹽之稅是食鹽
之民已寓稅於買鹽之內而認稅之商早已浮稅於賣
鹽之中兩得其便又稱拾壹州縣困苦已極爾部仍議
令分銷貳處鹽引恐窮民愈致苦累着再詳議具奏臣

部再議覆

准郴州等處之民既稱困苦已極應仍照舊例買食粵東

之鹽粵商照舊運鹽以供楚民之用嗣後銷引考成
責之連州韶州等處之官再請

勅該撫嚴飭柳州等州縣印官查緝私販以疏粵鹽如有
奉行不力即行指名題參

一康熙柒年捌月廣東巡撫劉秉權題為更定鹽法考
成奏銷之例以示畫一之規臣部覆

准查康熙陸年分鹽課冊報貯庫銀兩內抵補潮州府各
縣虛糧鹽鈔銀叁千陸兩捌錢肆厘伍毫陸絲肆忽
邁年俱照賦役全書開載支給但此項銀兩如果係

虛數無徵自應

題明除豁何得每年將鹽課抵補行令該撫將此項鹽

課自康熙柒年為始不准抵補仍在鹽課項下留充
兵餉續據該撫咨報冊開潮州府廣濟橋鹽餉銀兩
項下邁年該府照依賦役全書開載支發銀叁千陸
兩捌錢零抵補潮揭等縣虛糧鹽鈔之用俱於各年
鹽課叅冊報銷而兵餉冊內亦照扣除歷年造報不
獨自康熙陸年為始也且陸年鹽課先造印冊見存
藩司而抵補虛糧鹽鈔銀兩藩司以兵餉缺額未經

扣除非鹽司道之失於移報也今奉部查業經備行
潮州府遵照自康熙柒年為始不准抵補留充兵餉
臣部議得鹽鈔虛糧銀兩自康熙柒年為始不准抵
補冊內既經註明相應存查

一康熙柒年拾貳月廣東巡撫劉秉權題稱連韶貳路
鹽引行於湖廣柳州宜章等州縣又仁化埤引行
於桂陽桂東鄱縣三縣原經題定同粵東一體考成
今偏沅撫臣周召南具有鹽課確有定例等事一疏
部覆柳州等處之民仍食粵鹽嗣後銷引考成責之

連州韶州等處之官茲據海鹽道呈詳連州原有額
引壹千壹百零叁道柒分樂昌縣原有額引柒百道
仁化縣原有額引叁百陸拾叁道伍分及扶溪埤引
陸拾伍道仍應按額督銷照例考成外連州一路尚
存引叁百伍拾玖道貳分係湖廣桂陽臨武藍山嘉
禾肆州縣應銷之數韶州一路尚存引叁百零壹道
係湖廣郴州宜章永興寧肆州縣應銷之數仁化
一路尚餘引肆百捌拾壹道伍分係湖廣桂陽桂東
鄱縣叁縣應銷之數楚屬各州縣前奉有考成之責

尚不肯分銷引目今以拾壹州縣不認之引歸併粵
之參州縣考成是粵中之官於應銷額引之外又代
楚省加引不堪重累實難責銷相應以楚省當日應
銷之引照鹽書舊例聽商散拆逐年於叅冊內註明
報部不入粵官考成庶楚粵應無偏枯之嘆臣部覆
准查各省行引地方俱有銷引考成並無聽商散拆之例
其郴州等拾壹州縣先據偏撫疏稱食粵商興販之
鹽自裕買鹽之稅是食鹽之民已寓稅於買鹽之內
臣部覆令仍照舊例買食粵東之鹽粵商照舊運鹽
以供楚民之用嗣後銷引考成責之連州韶州等處
之官仍嚴飭郴州等州縣印官查緝私販以疏粵鹽
如有奉行不力即指名題叅今應仍照前

旨遵行如粵商運鹽不足考成連韶等處之官如楚屬拾
壹州縣不按額買食粵東之鹽即將楚屬未完州縣
官指名題叅

一康熙捌年正月廣東巡撫劉秉權題稱湖廣衡永寶
參府改食淮鹽應除粵東課餉銀兩一案准戶部咨
查先後所報數目不符緣由茲據海鹽道詳稱衡永

寶參府應食生鹽實該除粵東課餉銀陸千肆百肆
兩參錢零改入淮額其康熙貳年間冊報係錯按水
客熟鹽例計算所以今比前報少銀壹千壹百兩零
至於郴州桂陽等州縣原冊報亦錯按熟鹽例計算
其韶州壹路原額引肆千貳百道除樂昌縣認引柒
百道其餘湖廣郴州宜章永興興寧肆州縣該引參
千伍百道內除康熙元貳年禁海缺引參千壹百玖
拾玖引今尚存銷引參百零壹道仍在粵東納課餉
銀陸百柒拾壹兩玖錢參分零又連州一路除連州
認引壹千壹百零參道柒分其餘湖廣桂陽臨武藍
山嘉禾各州縣該引參千玖拾陸引零參分內除康
熙元貳年禁海缺引貳千柒百參拾柒引壹分今尚
存銷引參百伍拾玖道貳分仍在粵東納課銀捌百
肆拾肆兩玖錢伍分零至於生鹽錯報熟鹽前任司
道等官難辭舛錯之咎臣部覆查康熙貳年間前撫
盧興祖疏稱衡永寶參府及郴州桂陽等州縣共行
粵東引壹萬壹千伍百玖引共在粵東納銀貳萬伍
千貳百伍拾玖兩零內郴州桂陽等處該銀壹萬柒

千柒百伍拾肆兩零銜永寶參府該銀柒千伍百伍
兩壹錢捌分零前兩淮巡鹽御史疏內照依此數派
引行鹽今郴州桂陽等州縣仍前粵東納課行鹽毋
容議改其參府改准據稱實該除粵東課銀陸千肆
百肆兩叁錢零比原認之數減少則引目亦應照減
但恐不敷參府民食請

勅兩淮巡鹽御史將此參府引數應否照減查明具題隨
據該御史郭丕等疏稱參府改行淮鹽係照課定引
原行共捌萬壹千柒百陸引課銀伍萬伍千壹百捌

拾陸兩零今照該撫疏減課銀壹萬捌千捌百伍拾
肆兩陸錢玖分零應減引貳萬柒千玖百拾伍引商
人周學思等雖因丁未綱鹽壅滯意欲減引疏鹽查
湖南驛鹽道饒宇斌呈稱湖南民居日集參府行鹽
不足民食今將引鹽比原額減去民食不足亦未可
知不減照原額行恐引鹽壅滯臣等難以懸議祈

勅下偏沅巡撫確查具題臣部請行該撫確查再議據偏
撫盧震覆稱參府地方遼濶生齒漸繁查見在之民
食見在之鹽無壅滯不足之事似應仍舊無煩紛更

臣部覆

准查參府之鹽該撫既稱生齒漸繁無壅滯不足之事應請

勅兩淮巡鹽御史仍依原題粵東課銀貳萬伍千貳百伍拾玖兩之數照舊派銷引目至於郴州等州縣仍行粵鹽其廣東鹽課內將衡州等參府銀陸千肆百肆兩參錢零應行減除

一康熙玖年伍月廣東巡撫劉秉權題稱合浦場雖奉題留口子因邊界隔遠不能朝出暮歸向未開煎歸德

場界外山塘田地因奉禁不許耕種盡屬荒廢二處缺額實無可追徵各官結報委非支飾合請

勅部議容臣陸續招丁墾復另報增額臣部覆

准查合浦歸德貳場缺額該撫既稱因未經開煎及界外田地奉禁不許耕種無可追徵相應免追從前缺課今邊界已展以後令該撫照額督徵

一康熙拾年捌月廣東巡撫劉秉權題稱連韶貳路額引舊例分銷於湖廣郴桂等州縣臣屢催運鹽以供楚民之用乃楚民不按額買食鹽包尚多堆積楚

屬各官竟爾違玩一任鹽包堆積歲終查取完欠隔
省催呼置之膜外請

勅偏沅撫臣嚴飭捌州縣將見積鹽包速行接運并責令
此後分認每年額銷數目按季差商接運比照江西
南贛貳府屬見行定例年終將運過鹽包實數造冊
報粵會計分數奏銷臣部覆

准查廣東連韶貳路鹽引舊例分銷於楚屬郴桂等捌州
縣康熙柒年臣部

題明如粵商運鹽不足考成連韶等處之官楚屬州縣
不按額買食粵東之鹽即將楚屬未完州縣官題叅
今桂陽等州縣將康熙玖年分鹽引不行上緊督銷
以致鹽積引壅且不報完欠其各官俱應議處仍

勅偏沅巡撫嚴飭捌州縣官速將見積鹽包運銷再查各
省州縣俱有考成之例惟楚屬郴桂等州縣並無考
成因不行上緊督銷粵鹽故致鹽積引壅嗣後應令
該撫按捌州縣戶口多寡分定額數行銷如不銷完
即將捌州縣官算作分數

題叅

一康熙拾壹年叁月偏沅巡撫盧震為更定鹽法考成
奏銷之例以示畫一之規題稱臣屬湖南郴州桂等州
州縣地居三湘之末民處萬山之中寥寥殘黎盡是
鶉衣鵠面且近苗徭人蠻俗鄙田土瘠薄家鮮素封
業無商旅誠楚民之最苦者先因廣東連州板累認
商分引曾於康熙陸年前撫周召南具題已為各州

縣窮民請

命部議分銷奉

旨據稱拾壹州縣困苦已極爾部仍議令分銷貳處鹽引

恐窮民愈致苦累着再議具奏隨經部議郴州等處之
民既稱困苦已極仍照舊例買食粵東之鹽粵商照
舊運鹽以供楚民之用嗣後銷引考成責之連州韶
州等處之官再嚴飭郴州等州縣查緝私販以疏粵
鹽如有奉行不力指名題參奉有依議之

旨已於柒捌兩年楚民遵行買食無異及至玖年粵中關
稱鹽引未銷以致廣東撫臣遂具更定鹽法考成一
疏部覆將見在堆積之鹽令八州縣運銷嗣後按捌
州縣戶口多寡分定額數行銷更定楚屬各官考成

臣思崇捌兩年粵商鹽包業已運楚買銷從前所買之鹽即是戶口足用之數加多難食課亦難辦如造戶口花名定以銷引數目而派引累民之功令又誰敢自知而自犯耶况極窮之民萬難聚本充商如以商鹽再派食鹽之戶必至閭閻驚避不寧不但悞銷鹽斤抑且逋負正賦哀籲仍遵前

旨粵商運鹽粵官督銷引目楚民買食楚官嚴緝私販如有遵行不力各行

題叅臣部覆

准查康熙柒年間廣東巡撫劉秉權疏稱粵中之官於應銷額引之外又代楚省加引不堪重累請將楚省應銷之引聽商拆散不入粵官考成臣部議覆如粵商運鹽不足考成連韶等處之官如楚屬州縣不按額買食粵東之鹽即將楚屬未完州縣官指名題叅續於康熙拾年間據粵撫疏稱郴桂等州縣不按額買食粵鹽一任鹽包堆積隔省催呼置之膜外請

勅偏沅撫臣嚴飭桂陽等州縣將見積鹽包速運年終將運過鹽包實數造冊報粵會計分數奏銷臣部因各

州縣俱有考成之例惟楚屬桂陽等州縣並無考成
故不行上緊督銷嗣後按州縣戶口多寡分定額數
行銷如不銷完即將捌州縣官算作分數題叅在案
况粵鹽運至南雄府江西州縣官令商買銷州縣官
俱有考成江西與湖廣俱係一例湖廣捌州縣官若
不行考成粵鹽課餉必致拖欠該撫所奏不便允從
應仍照前議考成

一康熙拾壹年閏柒月廣東巡撫劉秉權題稱連州一
路原額引肆千貳百道內除連州應銷引壹千壹百

零叁道柒分尚有引叁千玖拾陸道叁分行於湖廣

桂陽臨武藍山嘉禾四州縣銷售又韶州一路原額

引肆千貳百道內除樂昌縣應銷引柒百道尚有引
叁千伍百道行於湖廣柳州宜章永興興寧四州縣
銷售先經部議按八州縣戶口分銷如不銷完即計

算分數考成茲康熙拾年分連樂二州縣應銷額引
俱已照數銷完惟楚屬八州縣未報戶口認額分銷
致堆積鹽包壹萬有奇未據楚民買食未銷引伍千
伍拾捌引蓋因有運無銷商無餘本難以轉折實非

粵官督運之不力也楚屬既不遵報戶口無憑計算
考成乞

勅偏沅撫臣查明戶口會計應銷分数按列完欠并将不
報戶口職名報部查議更請嗣後粵鹽堆積至百引
以上歲報止叅楚官若楚民買食無鹽接運歲報止
叅粵官庶各有責成不致推諉臣部覆

准查康熙拾年間臣部因各省州縣俱有考成之例惟楚
屬柳桂等州縣並無考成將粵鹽不行上緊督銷故
致鹽引壅積嗣後應令該撫按八州縣戶口多寡分

定額數行銷如不銷完即將八州縣官員算作分数
題叅今稱堆積百引以上止叅楚官楚民買食無鹽
止叅粵官等語恐彼此推諉致悞鹽課應不准行至
於柳桂等八州縣官員並未遵報戶口以致鹽引鹽
包堆積應請

勅下偏沅巡撫速按戶口分定引額將積鹽運銷仍嚴查
八州縣未報戶口各官職名移送粵撫題叅

一康熙拾壹年閏柒月廣東巡撫劉秉權題稱查得倉
鹽原備西省官運之額膳鹽又供衡桂藩王之需俱

係明季加徵水客之數自

清朝定昂明藩盡廢西運已停恢復之初未經詳請豁免
相沿舊例責令上倉變價充餉照原經制額載捌千
捌百玖拾陸兩肆錢伍分伍厘陸毫起解尚有溢額
銀兩俱經分別造報但此項鹽包搭併部引行銷歲
中占缺水客正引軍餉餘鹽餉銀非為經久今遵更
議水客生鹽每引照運正鹽壹拾肆包免帶倉膳本
色每引徵充餉銀玖錢伍分壹厘零歲約徵銀壹萬
玖千陸百叁拾伍兩貳錢柒分肆厘零內除應照解

報倉膳扣還官餘鹽銀叁千陸百捌拾柒兩伍錢玖
分伍厘零尚蠲額倉膳充餉銀壹萬伍千玖百肆拾
柒兩陸錢柒分捌厘零應於額外另項報銷既不占
引又不缺餉臣以立法務期通久復行查詢水客實
係商便課盈衆心允協取各水客認結送部查核臣
部覆

准查鹽課經制冊開水客生鹽每引帶割首自報鹽壹百
叁拾柒斤將本色鹽積包又令加帶鹽壹百貳拾貳
斤分作貳包上倉備交粵西官運完日共扣還官餘

鹽價銀捌千捌百玖拾陸兩肆錢伍分零克還解額
今該撫既稱水客情願免帶倉膳鹽斤改徵折價每
引玖錢伍分壹厘零既不占引又不缺餉取有水客
認結應自康熙拾貳年為始照數徵收定為經制每
年入額考成



